

სამი სიფინღე ნიკოლოზ გულაბერისძის
„საპიტხავსა“ და საბალოგლეშში

ქართველი ერისათვის მრავალმხრივ მნიშვნელოვანი თხზულების „მოქცევაჲ ქართლი-საჲს“ თავდაპირველი ვერსია, როგორც თვით ტექსტი მოწმობს, IV საუკუნეში უნდა შექმნილიყო, მაგრამ მან სახეცვლილი რედაქციით მოაღწია ჩვენამდე. იგი მოგვითხრობს ქრისტიანულ სარწმუნოებაზე საქართველოს მოქცევის შესახებ, მასში დასმული საკითხი და მოთხრობილი ამბავი კონცეპტუალურია ქართველი ერისათვის, რაც რამდენიმე ავტორის თხზულებაში მისი ასახვისა და ქართლის მოქცევის შესახებ სხვადასხვა საღვთისმეტყველო ჟანრის რამდენიმე თხზულების შექმნის საფუძველი გახდა. საქართველო უფლის რჩეული ქვეყანაა, სადაც მაცხოვრის კვართმა, ჯვარცმის ჯვრის ფიცრის ნაწილმა და ჯვარცმის სამსჭვალმა დაივანა, იგი ყოვლადწმინდა ღვთისმშობლის წილხვედრილია, აქ იქადაგეს მაცხოვრის მოწაფეებმა, რასაც როგორც ქართული, ისე უცხოური წყაროები გადმოგვცემენ. მესიანურმა იდეამაც ქართულ მწერლობაში ყოველივე ამის საფუძველზე პოვა ასახვა.

ნიკოლოზ გულაბერისძის თხზულებაში, რომელიც ერთ-ერთი ბოლო ვერსიაა ქართლის მოქცევის შესახებ დაწერილ თხზულებათან, სათაურშივეა გამოტანილი სამი სიწმინდე („საკითხავი სუეტისა ცხოველისაჲ, კუართისა საუფლოჲსა და კათოლიკე ეკლესიისაჲ“), რომელთა სიმბოლური მნიშვნელობისა და ერის იდენტობის განსაზღვრისათვის თითოეული მათგანის ღირებულების შესახებ ცალ-ცალკე ვისაუბრებთ.

1. უფლის კვართის შესახებ რამდენიმე ქართული თხზულება მოგვითხრობს და ყველგან თითქმის ერთნაირადაა გადმოცემული, რომ მან საქართველოში, მცხეთაში დაივანა, სადაც შემდგომში სვეტიცხოვლის ტაძარი აიგო, რითაც გამჟღავნდა ღმერთის დამოკიდებულება ქართველი ერისადმი. უფლის კვართის ერთიანობა და განუყოფლობა მთელი ქრისტიანული სამყაროსათვის ატარებს სიმბოლურ ხასიათს, რადგან იგი ქრისტიანული სამყაროს განუყოფლობას, ერთიანობას მოწმობს.

უფლის კვართის სიმბოლოებების უმთავრესი საფუძველი ძველ აღთქმაშია საძიებელი. როდესაც ღმერთმა ადამი და ევა თავდაპირველი სამყოფლიდან, სამოთხიდან გამოაძევა, „უკმნა უფალმან ღმერთმან ადამს და ცოლსა მისსა სამოსელნი ტყავისანი და შეჰმოსნა მათ“ (შეს. 3:21), ღმერთის მიერ ედემიდან განდევნა მათთვის ღვთის რისხვის შედეგია, ღვთის სასჯელია. სწორედ ბიბლიური ნარატივის სიმბოლოებობა გახდა საღვთისმეტყველო ლიტერატურაში სამოსლის ღვთივსულიერი გააზრების საფუძველი. უფლის კვართი და ღმერთის მიერ სამოთხიდან გამოდევნილი ადამისა და ევას ტყავის სამოსელი ბინარული ოპოზიციაა; ისინი ერთმანეთს უპირისპირდებიან, როგორც „პირველი იგი კაცი“, რომელიც აკრძალული ნაყოფის გემოასხილვისა და პირველცოდვის ჩადენის გამო განკლებულ იქნა სამოთხიდან, და „მეორე იგი კაცი“, რომელმაც გამოისყიდა უწინარეს ყოვლისა „პირველი იგი კაცის“, შემდეგ მთელი კაცობრიობის ცოდვა. ამიტომ ნათლისღების შედეგად ყოველი ადამიანი პირველცოდვისაგან განიწმინდება. წმ. ანდრია კრიტელის „დიდი კანონი“ შესაქმნის წიგნის ინტერპრეტაციაა, იგი გვაუწყებს: „შემიკურნა ტყავისა სამოსელნი ცოდამან ჩემმან და ღმრთივესოფილი სამოსელი განმძარცვა. მმოსიეს მე სამოსელი კდებისა, მსგავსად ლეღვის ფურცელთა, მხილებად თვთმფლობელთა ვნებათა“ – „განებძარე მე პირველი სამოსელი, რომელი პირველითგან მიქსოვა ღმერთმან და ვსძე მე შიშველი. მმოსიეს მე ხენუმი კუართი, რომელი მიქსოვა გუელმან ედემს განზრახვითა და კდებულ ვარ შენგან“ (წმ. ანდრია კრიტელი, 2002: 34-35). ტყავის სამოსელი ცოდვის სამოსელია, უფლის კვართი „ზეითგამო ქსოვილია“, წმინდა სამოსელია, რომელიც წილად ხვდა საქართველოს და აქ დაიგანა.

კვართის, და ზოგადად, სამოსლის წილისყრის წინასწარმეტყველება ძველი აღთქმის წიგნებიდან, დავით და ესაია წინასწარმეტყველთა წიგნებიდან იღებს სათავეს, ხოლო მათეს სახარება შეგვახსენებს მათ მიერ ნათქვამს და ჯვარცმული ქრისტეს კვართის წილისყრის შესახებ გვამცნობს: „და ვითარცა ჯუარს-აცუეს იგი, განიყვეს სამოსელი მისი და განიგდეს წილი, რაათა აღესრულოს თქუმული იგი წინასწარმეტყველისა მიერ, რომელსაცა იტყუს: „განიყვეს სამოსელი ჩემი მათ შორის და კუართსა ჩემსა ზედა განიგდეს წილი“ (ფს. 21, 19)“ (მთ. 27, 35; შდრ.: მრ. 15, 24; ლ. 23, 24), ხოლო იოანეს სახარება ღრმა სიმბოლოებით განმარტავს კვართის განუყოფლობის, დაუნაწევრებლობის მნიშვნელობას: „და ერისგანთა მათ, რომელთა ჯუარს-აცუეს იესუ, მოიღეს სამოსელი მისი და განიყვეს ოთხად ნაწილად თითოეულმან ერისგანმან ნაწილი. ხოლო კუართი იგი, რამეთუ იყო უკერველ, ზეითგამო ქსოვილ ყოვლად, თქუეს უკუე ურთიერთას: არა განეხიოთ ესე არამედ წილ-ვიგდოთ ამას ზედა, ვისაცა იყოს, რაათა აღესრულოს წერილი იგი: განიყვეს სამოსელი ჩემი თავისა მათისა და კუართსა ჩემსა ზედა განიგდეს წილი“. ერისგანთა მათ ესე ყვეს“ (ი. 19, 23-24). წმ. იოანე ოქროპირმა წმ. იოანე მახარებლის სიტყვები შემდეგნაირად განმარტა: „ხოლო სიტყუა იგი, თუ „ზეით მოქსოვილ“, არა ცუდად არს, არამედ გჰგონებ, თუ იგავი არს, რომელი მოასწავებს, ვითარმედ არა ლიტონი ოდენ კაცი იყო ჯუარს-ცუმით, არამედ ზეითცა ღმრთიებამ აქუნდა, რომელ-იგი ბუნებამ ღმრთიებისამ უნებელად ეგო და განუკუთილად, ხოლო კორცთა ბუნებამან იენო და მოიწყლა. და

კულად ვითნიძე იტყვან, ვითარმედ სახეს მასცა სამოსლისას მოასწავებს მახარებელი, რამეთუ პალესტინეს ორთა სამოსელთა შეურთებენ და მოჰქსოვენ ერთად და შეიქმან მას კუართად და უწოდენ მას ზეთ მოქსოილად. და თქუა იგი მახარებელმან, რამათმცა მოასწავა უნდოებამ იგი მისი, რამეთუ ეგვიპთარი იგი კუართი უნდომ არს, რომელი-იგი სახე იყო პირველთქუმულისა მის სიტყვისაჲ, რომელ ვთქუთ ამისთვის ზეთ მოქსოვილისა“ (წმ. იოანე ოქროპირი, 1993: 309).

უფლის კვართი ღვთის განგებით მოხვდა საქართველოში. ამის თაობაზე ნიკოლოზ გულაბერისძის „საკითხავი“ საგანგებოდ მოგვითხრობს იმ ტრადიციათა კვალობაზე, რაც სათავეს იღებს „მოქცევაჲ ქართლისაჲდან“ და რაც აბიათარ მღვდლის მონათხრობით არის მკითხველისათვის ცნობილი. უფლის კვართის საქართველოში მოხვედრა ქართველი ერისადმი ღვთის დამოკიდებულებამ და ყოვლადწმიდა ღვთისმშობლისადმი მისმა წილხვედრილობამ განაპირობა: „ხოლო კუართსა მას ზედა უფლისასა წილიგდეს უღმერთთა ჰურიათა ჯუარსცუმასა უფლისასა და განგებულებამან ღმრთისამან მიასუდრა მცხეთელთა ჰურიათა, არათუ კეთილთმოქმედებისა რაჲსათჳსმე ღირს იყენეს უღირსნი იგი. გარნა იგივე ღმერთი განგებულებით წინაჲსწარვე განაგებდა, რომელი ცხორებისათჳს ჩუენისა ქუეყანად გარდამოკდა, რამეთუ წინაჲსწარვე განგვო სახიერსა მას ამისა სამუფოსაჲა ერად საზეპუროდ შემზადებამ, და ვინამთგან ნაწოლიცა იყო ყოვლადწმიდისა ღმრთისმშობლისაჲა, ამისთვის უფრომსლა ღირს იქმნა ამას საშინელსა მადლსა ესე კედარი. ამისთვისცა უკუე წინაჲსწარვე წარმოავლინა მადლი ღმრთეებისა მისისაჲ, რამთა პირველადვე დაიწინდოს კუართითა მით და მადლითა ღმრთეებისა მისისაჲთა“ (გულაბერისძე, 2007: 14). ნიკოლოზ გულაბერისძე მცხეთაში უფლის კვართის მოტანისა და ელიოზის მიერ დისთვის მისი გადაცემის ამბის მოთხრობის შემდეგ ელიოზის დის სულის წარხდომის სამ მიზეზს ასახელებს: „პირველად უკუე – უფლისა სიკუდილისა და ვნებისა მისისათჳს; მეორედ – რამეთუ ეზიარა ძმამ იგი მისი სისხლსა უფლისასა; ხოლო მესამედ – ვინამთგან მოეკსენა დედისა თჳსისა იგი მწუხარებით სიკუდილი, ვინამთგან უკუე ყოველივე მწუხარებამ ერთბამად შემოუკრბა. ამისთვისცა ძლეულ იქმნა ბუნებისაგან კაცობრივისა და სიკუდილი დაესაჯა ღმობილსა მწუხარებათაგან ფრიადთა“ (გულაბერისძე, 2007: 15). აქ ელიოზის დის გარდაცვალების სამი მიზეზია ჩამოთვლილი: 1. მაცხოვრის ვნება და სიკვდილი; 2. ელიოზის ზიარება მაცხოვრის სისხლთან, რაც ზიარების საიდუმლოს არ ნიშნავს; 3. მაცხოვრის სიკვდილის გამო დედის გარდაცვალების გახსენება; ეს მიზეზები ერთად შემოაწვა ელიოზის დას გულზე ჯავრად, ადამიანური ბუნებისაგან იძლია და მწუხარებისაგან გარდაიცვალა. ელიოზის დის გარდაცვალების მიზეზები განსაკუთრებულ ყურადღებას იმსახურებს, ვინაიდან ნიკოლოზ გულაბერისძის მიერ დასახელებული საბუთები ელიოზის დის მიცვალების მიზეზად წარმოაჩენს უფლის ვნებაში მცხეთელ ჰურიათა წილის, ბრალეულობის ქართული წყაროების ტრადიციისაგან განსხვავებულ ვერსიას, რომლის მიხედვით ისინი თანამოზიარენი არიან მაცხოვრის წამებისა: „პირველად უკუე – უფლისა სიკუდილისა და ვნებისა მისისათჳს, მეორედ – რამეთუ ეზიარა ძმამ მისი სისხლსა უფლისასა“ (გულაბერისძე, 2007: 15).

ეს შეხედულება ეწინააღმდეგება „მოქცევაჲ ქართლისაჲს“ ვერსიას, რომელიც მცხეთელ პურიათ თავიდან აცილებს მაცხოვრის წამებისას დაღვრილი სისხლის გამო პასუხისმგებლობას. „მოქცევაჲ ქართლისაჲს“ შატბერდულ-ჭელიშური რედაქცია, ლეონტი მროველისეული და არსენ ბერისეული რედაქციები „წმ. ნინოს ცხოვრებისა“ ქრისტეს სისხლის მონაწილედ არ ხდიან ელიოზს, ხოლო ნიკოლოზ გულაბერისძესთან მცხეთელ ელიოზზეც ნაწილდება მაცხოვრის წამებისას დაღვრილი სისხლის ბრალი (ამას მოუთითებს ფრაზა: „რამეთუ ეზიარა ძმამ მისი სისხლსა უფლისასა“, რომელშიც „ზიარება სისხლთან“ ბრალობის აღმნიშვნელია, სამართლებრივი ტერმინია). ე. ი. ნიკოლოზ გულაბერისძის თხზულების მიხედვით, ელიოზი ეზიარა სისხლსა მაცხოვრისა. უფლის მიცვალებასა და ამიერქვეყნით მის ხორციელ განსვლას დაუკავშირდა ჯერ ელიოზის დედის, შემდეგ კი ელიოზის დის გარდაცვალებაც, ხოლო ელიოზის გარდაცვლილი დისთვის კვართის ხელიდან გამოცლა ვერაფერ შეძლო და იგი კვართიანად დაკრძალეს. მეფე ადერკს ძლიერ მოეწონა უფლის კვართი და სწადა ელიოზის მიცვალებული დისთვის მისი გამოღება, მაგრამ ვერ შეძლეს. „საკითხავში“ ეს იმითაა ახსნილი, რომ უწმინდური, უსჯულო მეფის ხელი კვართს არ უნდა შეხებოდა. შემდეგშიც ბევრჯერ სცადეს უფლის კვართის მოძიება, კერძოდ, მას ეძიებდა მეფე ამაზაელ, მაგრამ ვერ მიაგნეს. ნიკოლოზის სიტყვით, მისი ხილვა შემდეგშიც შეუძლებელი იყო და ამჟამადაც კაცთა თვალთაგან არის მიფარული. მხოლოდ წმ. ნინოს ძალისხმევით, მისი ლოცვითა და წმინდანური ცხოვრებით გახდა შესაძლებელი უფლის კვართის დაფლვის ადგილის მიგნება და იქ სვეტიცხოვლის ტაძრის აგება.

ნიკოლოზისავე საგალობელი ზეამაღლებული განწყობითა და ეროვნული სიამაყის გრძნობით გვამცნობს: „*კუართი წმიდაჲ მქსნელისაჲ, რომელ მყის აღტაცებით მოიწია პირველვე განგებულებით, სადა შეიმზადებოდა საყდარი ღმრთისაჲ, რომელსა ძრწოლით თაყუანის-ცსკებთ*“ (გულაბერისძე, 2007: 69); „*მ კუართო საღმრთოო, რომელსა ზედა ელვებრ მზის სახედ ვნათობს სუეტი ყოვლად წმიდაჲ და უზილაყად ანგელოზთა დასნი ძნობით გალობენ და ქრისტესა აკურთხევენ უკუნისამდე*“ (გულაბერისძე, 2007: 72). უფლის კვართის ადგილზე აღმართული ცხოველი სვეტი სულიერი ნათლითაა გაბრწყინებული: „*რომელი ჰნათობს საუფლოსა და ზეგარდამო ქსოილსა კუართსა ზედა და ელვებრ აკრთობს ცათა მობაძაქსა საყდარსა*“ (გულაბერისძე, 2007: 75). ავტორი სვეტი ცხოველს მიმართავს: „*ვიხაროდენ, რამეთუ წმიდასა ზედა და ნეტარსა სცისკროი კუართსა*“ (გულაბერისძე, 2007: 75); „*მ რამამი სიტკობებისაჲ, სულისა უკუდაფყოფელო, რამეთუ სამებისა წმიდისა გამომხატველთა საყდარსა ღმრთისაჲს, სუეტსა ნათლისაჲსა და კუართსა წმიდასა საუფლოჲსა ერი მორწმუნეთა უგალობს და ქებასა შესახამს, რომელსა ანგელოზნი ძნობით უპირობენ*“ (გულაბერისძე, 2007: 76);

1 ამ კონტექსტში სისხლთან ზიარება ღმერთთან მისტიკურ კავშირს, ზიარების საიდუმლოს რომ მიანიშნებდეს, მაშინ მხოლოდ სისხლი არ იქნებოდა ნასხენები, ვინაიდან წმიდა ზიარება ნიშნავს ქრისტეს სისხლისა და ხორცის მიღება-ზიარებას. ეს რომ ასე არ ყოფილიყო, ელიოზის დის სიკვდილის ერთ-ერთ მიზეზად ქრისტეს სისხლთან ზიარება არ დასახელდებოდა. ამ საკითხის შესახებ სამეცნიერო ლიტერატურაში გამოთქმულია სხვა მოსაზრებაც. იხ. გ. უკუქუხიძე, უფლის კვართის სიმბოლოკოსაფის, ქ. ცისკარი, 1998, №3.

„კუართი ბრწყინავს, სუეტი ნათობს, ჯეუარი ჰკრთების და სხივთა ელვებრ განუტეობს“ (გულაბერისძე, 2007: 79). სამი წმიდა ნივთი, სამსახეთა მსგავსი — ეკლესია, კვართი და სვეტი ცხოველი — წარმოსახული „საკითხავში“ და შექტებული საგალობელში, სამების გამომსახველად აღიქმება ნიკოლოზ გულაბერისძის, როგორც შემსხმელისა და ჰიმნოგრაფის მიერ.

უფლის კვართი სიმბოლოა ეკლესიის ერთიანობისა. ჯვარცმის შემდეგ უფლის კვართი კი არ დაანაწევრეს, არამედ ერთიანად წილი ჰყარეს მასზე. კვართის დაუნაწევრებლობა, განუყოფლობა და ერთიანობა ეკლესიის ერთიანობის მაუწყებელია. უფლის კვართმა ქართველი ერისათვის სხვა სიმბოლური მნიშვნელობაც, ერის იდენტობის მნიშვნელობა შეიძინა, იგი გამოსახეს ბაგრატიონთა სამეფო გერბზე, ვითარცა სიმბოლო ქვეყნის ერთიანობისა, დაუნაწევრებლობისა, ერთიანი ეკლესიის არსებობისა, ერთიანი ერის ფლობისა. უფლის კვართის დაუნაწევრებლობა ადამიანის სულიერი განახლების მომასწავებელიცაა, იგი „ახალი კაცის“, ჰარმონიული და უცოდველი პირველსახის დამბრუნებელი ადამიანის სიმბოლოცაა.

აქვე უთუოდ უნდა ითქვას ელიას ხალენის შესახებაც, რომლის საქართველოში დავანება მას წინასწარმეტყველების აღსრულების წინასაფხურად მოგვააზრებინებს, იმის წინასწარ მინიშნებად აღგვაქმნევენებს, რომ მომავალში უფლის კვართი საქართველოში დაივანებდა. უძველესი ქართული და უცხოური საისტორიო წყაროები მიუთითებენ, რომ ებრაელები ქართლში ძვ. წ. VI საუკუნეში მოსულან. ახალი წელთაღრიცხვის დამდგენსათვის ისინი მცხეთაში მყარად მკვიდრობდნენ. მათ ძველი აღთქმა საქართველოში ძველი აღთქმისავე ეპოქაში მოიტანეს, რითაც, ფაქტობრივად, ქართველ ერს ბიბლიური ჭეშმარიტებისაკენ მიმავალი გზა გაუხსნეს. საკრალურად ამის დასტურია ელიას ხალენის მცხეთაში დაფლულობა, რაც, როგორც ზემოთაც ითქვა, უფლის კვართის ასევე მცხეთაში დავანების წინასწარმეტყველება იყო. ელიას ხალენი — უფლის კვართი — მაცხოვრის ხელთუქმნელი ხატი არის ის სამი ხელშეუხებელი სიწმიდე, რომლებიც უფალმა საქართველოს სხვადასხვა დროს მიუბოძა.

III საუკუნის დიდი მღვდელმოწამე, ღვთისმეტყველი წმ. კვიპრიანე კართაგენელი უფლის კვართის ერთიანობის შესახებ გვაუწყებს: „ერთიანობის ეს საკრამენტი, ეს საკრველი განუყოფლად შეკავშირებული თანხმობისა, სახარებაში ცხადდება იმით, რომ კვართი უფლისა იესო ქრისტესი („ტუნია დომინი იესუ ქრისტე“) არანაირად არ ნაწილდება, არც იხვევა, არამედ ქრისტეს სამოსზე წილისყრის ეპოს... (კვართი) მიიღება როგორც მთლიანი სამოსი და სამფლობელოდ გადაეცემა დაუზიანებელი და დაუნაწილებელი. კვართი მატარებელი იყო იმ ერთიანობისა, რაც ზემოდან, ანუ ციდან და მამისაგან მოდის და რაც არანაირად არ შეიძლებოდა დარღვეულიყო მისი (კვართის) მიმღებლისა და მფლობელის მიერ, არამედ იგი განუყოფლად იცავდა ერთობლივად მთლიან და მკვრივ სიმტკიცეს. ქრისტეს შესამოსლის ფლობა არ ძალუძს მას, ვინც არღვევს და ყოფს ქრისტეს ეკლესიას... ქრისტეს ხალხი არ შეიძლება დანაწევრდეს, მისი კვართი მთლიანად ნაქსოვი და შეკავშირებული, არ შეიძლება დაიყოს მფლობელთა მიერ. სამოსლის საკრამენტითა და ნიშნით სახარებამ ცხადყო ეკლესიის

ერთიანობა“ (ეკლესიის ერთიანობის შესახებ. თავი 7) (ჭელიძე, 1997: 8).

უფლის კვართი, როგორც უწმიდესი რელიკვია, მოიცავს და აბთლიანებს ყველა იმ ქრისტიანულ სიწმიდეს, რასაც საქართველოს ეკლესია ფლობდა და ფლობს, კერძოდ, საუფლო ვერის ნაწილი, ფიცრები, რომლებზეც დამსჭვალეს მაცხოვრის ფეხები, სამსჭვალე, რომლითაც მაცხოვრის ხელები ვეარს მიაჭედეს (ერთი ამ სამსჭვალთაგანი საქართველოს საპატრიარქოში ამჟამადაც ინახება). საქართველოში, მცხეთაში კვართის დაფლვამ მცხეთა „მეორე იერუსალიმად“, „ახალ იერუსალიმად“, ზეციურ, სულიერ ქალაქად გარდასახა. საქართველოში უფლის კვართის ჩამოტანამდე წმ. ანდრია პირველწოდებულისა და შემდეგ წმ. ნინოს მოსვლამდე ქართველი ერი „ბნელსა შინა ვდა“, საქართველო იმყოფებოდა ბარბაროზთა და წარმართთა ხელთ, რის გამოც ნიჟორზე გულაპარისძემ „გალობანში“ მცხეთას „ოდესმე მგლოვიარე ქალაქი“ უწოდა: „ოდესმე მგლოვიარე ქალაქო მცხეთისაო, ეშმაკთა სიღოდასა და განცხრომასა შენ შორის, აჰა აწ ინარებდ და დღესასწაულობდ, ნაცვლად სიღოდათა მგალობლობენ შენ შორის ეკლესიისა შეიღნი სამარადისოდ“ (სულავა, 2003: 287). შემთხვევითი არ არის დამოწმებულ კონტექსტში ხსენება „ოდესმე მგლოვიარე ქალაქი მცხეთისა“, რადგან ერმა, ქვეყანამ დაუტყუა უსჯულოება, რითაც მარადიულობას ეხიარა. მცხეთის ამგვარ გააზრებას ღრმა სიმბოლოური ქრონოტოპოსი აქვს. ყოველი ქალაქის, ყოველი ტაძრის ადგილის შერჩევა საგანგებოდ ხდება, ხოლო მცხეთის დაარსების ისტორიის გასააზრებლად გასათვალისწინებელია ის გადმოცემები, რომლებიც მის ზეციურ პროტოტიპზე ზეციურ ტოპოსურ განზომილებაზე მიუთითებს. მცხეთა დაარსებულია მცხეთოსის მიერ, რაც მისი ისტორიის მითოლოგიურ ძირებს მიგვანიშნებს და რაც გვაფიქრებინებს, რომ მცხეთის ისტორია მითით იწყება. ეს მართლაც ასეა, მაგრამ იგი წარმართული მითია და წარმართულ ეპოქას ასახავს; მომავალში მისი გადასაკრალიზება უნდა მოხდეს, რაც ხანგრძლივი პროცესია და თანდათანობით მიმდინარეობს: ვერ ელიას ხალენი მკვიდრდება, როგორც წინასახე, პიპოდიგმა მაცხოვრის კვართისა, ხოლო შემდეგ ქრისტიანობის ერთ-ერთი უდიდესი სიწმინდე რელიკვია – მაცხოვრის კვართი, რომელმაც საფუძველი ჩაუყარა მცხეთის ჰაგიოტოპოსად გარდასახვას. ბოლოს მოდის ვაზის ვეარი, რომელმაც ქრისტეს ნათელი უნდა მიჰფინოს მცხეთასა და სრულიად საქართველოს. ამრიგად გარდაისახა „ოდესმე მგლოვიარე ქალაქი მცხეთისა“ ზეციურ, სულიერ იერუსალიმად.

კ. კეკელიძემ მცხეთისა და მისი შემოგარენის ტოპონიმია იერუსალიმსა და უფლის ამქვეყნიურ ცხოვრებასთან დაკავშირებულ წმინდა ადგილებს შეადარა: „ძველმა ქართულმა ეკლესიამ, რომელმაც თავისი დასაბამი წმინდა მიწიდან მიიღო, ტოპოგრაფიული თვალსაზრისითაც თავისი დედისაგან – იერუსალიმის ეკლესიისაგან მიიღო ასლი, როდესაც მცხეთასა და მის მიდამოებში შექმნა ყველა ის უმთავრესი პუნქტი, რომლებთანაც დაკავშირებული იყო ქრისტეს ამქვეყნიური ცხოვრების უმნიშვნელოვანესი მოვლენები, მცხეთა – ქართული იერუსალიმი“ (კეკელიძე, 1957: 362). იერუსალიმის სიონი 12 მოციქულის სახელობისაა, რომელიც ყველა ეკლესიის დედად იწოდება (სიონი ღვთისმშობლის სიმბოლოცაა), ანალოგი აქვს საქართველოში სვეტიცხოვლის

სახით, რომელიც 12 მოციქულის სახელობისა და, რ. სირაძის შრომის მიხედვით, აგრეთვე, სიონდაც იწოდება (სირაძე, 1992: 119). მცხეთაშივე შემორჩენილია გამოქვაბული ეკლესიის ნანგრევებით, რომელსაც ბეთლემს უწოდებენ, სწორედ აქ, მდინარე მტკვარში მონათლენ პირველი ქრისტიანი ქართველები; მტკვრის მარჯვენა მხარეს, სამხრეთით, მცხეთის პირდაპირ, თაბორის მთაა, მასზე ფერისცვალების სახელობის მონასტერი ყოფილა აღმართული. მცხეთის ჩრდილოეთით კი ამაღლების, იგივე ელენის ანუ ზეთისხილის მთა მდებარეობს; სამხრეთ-აღმოსავლეთით ბეთანიაა, ხოლო არაგვის მარცხენა სანაპიროზე, მტკვრისა და არაგვის შესართავთან – გოლგოთის მთა, რომლის ერთ ფერდობს გეთსიმანია ეწოდება. მცხეთის გოლგოთის მთაზე აღმართული ჯვრის მონასტერი საუფლო ჯვრის ერთარსად აღიქმება (კეკელიძე, 1957: 362-363). ეს სიმბოლური შესაბამისობები იმას მიუთითებს, რომ სვეტიცხოვლის ტაძარში უფლისკვართის დაფლვის ადგილი მაცხოვრის საფლავის სიმბოლური მინიშნებაა. ამგვარი დამთხვევა და დაკავშირება მცხეთისა იერუსალიმთან მცხეთის სიმბოლური იერუსალიმური სახის სრულყოფის მაუწყებელი უნდა იყოს. „ახალი იერუსალიმის“, „ზეციური იერუსალიმის“ ჩამოყალიბება იწყება სამეფო ბაღის საღვთო ადგილად, ზეციური სამოთხის გარდასახვით (კეკელიძე, 1957: 362-363), რადგან მონასტრის არქიტექტონიკაში განსაკუთრებული ადგილი უჭირავს შიდა ბაღს, ეზოს, რომელიც სიმბოლურად სამოთხეს განასახიერებს. სამეცნიერო ლიტერატურაში აღნიშნულია, რომ მონასტრის ტოპოსი მის შუაგულში ბაღის, ვითარცა სამოთხის სიმბოლოს, გაშენებას გულისხმობდა (ლიხაოვი, 1987: 418-494; მოდებაძე, 2007: 69-70). ამიტომ წმ. ნინოს „ცხოვრებათა“ ყველა რედაქციაში აღნიშნული „სამოთხე“ ედემის ბაღის, ზეციური სამოთხის სულიერი მემკვიდრეა, ჰიპოდიმეაა. ზეციური, ახალი იერუსალიმის არსობრივი რაობა ისაა, რომ იგი პირველქმნილია, უცოდველობის ნიშნით აღბეჭდილია. მის წიაღში ყველაფერი წმინდაა, საკრალურია, ცოდვადაუცემელია. „სამოთხეში“ ზეციური ხეებია, ღვთისაგან საგანგებოდ დანერგილი, რომლებიც სიცოცხლის ხის სიმბოლოდ მოიაზრებიან.

ეს სიმბოლო – მცხეთის იერუსალიმური სახე არეკლილია ნიკოლოზ გულაბერისძის „საკითხავსა“ და საგალობლებში, რაც მისი მსოფლმხედველობის მესიანურ საფუძველს წარმოაჩენს.

2. არანაკლებ საყურადღებოა ის ფაქტი, რომ ავტორმა კაბადოკიიდან მოსულ წმ. ნინოს უწოდა „დედა ქართველთა თემისა“, დედა, რომლის ლოცვით არმაზს, საკერპთაყვანისმცემლო ადგილს, ღვთის ძალითა და ნებით მუქი დაატყდა, ხოლო უფლისკვართის დაფლვის ადგილას წმინდა სვეტი აღმართა. უნდა აღინიშნოს, რომ სივრცული თვალსაზრისით არმაზი და მცხეთაში ცხოველი სვეტის აღმართვის ადგილი ბინარული ოპოზიციანია ისევე, როგორც ცა და დედამიწა შუასაუკუნეობრივ ქრისტიანულ მსოფლმხედველობაში. როგორც ცა არის მარადიული და იდეალური სამყოფელი სულისა, ასევეა მცხეთა, სვეტიცხოველი ქართველებისათვის სულის საუფლო. საკრალური და წმინდაა ის ადგილი, სადაც უფლისკვართია დაფლული, სადაც ამოიზარდა წმინდა ხე – „ნაძვი ლიბანისა“, რომელიც აღმართა მოკვეთილი ხის ადგილას, ე. ი. უფლისკვართის დაფლვის ადგილას, წმინდა ტაძარი თორმეტი მოციქულის სახელობისა –

სვეტიცხოველი. უფლის კვართის ადგილას ამოზრდილი ხე ლიბანისა, ნაძვი ლიბანისა წმინდა ხეა, რომელიც უბირისპირდება სამოთხის იმ ხეს, რომლის ნაყოფის გემომასხილვამ ზეციური ადამი და ევა გარდასახა, ცოდვილნი გახადა. ბიბლიური ხე ცხოვრებისა და ცნობადისა, ერთი მხრივ, და ნაძვი ლიბანისა ბინარული ოპოზიციაა, რომელშიც სამყაროს ქმნადობისა და სამოთხიდან ადამიანის გამოდევნის პროცესია არეკლილი. აქედან გამომდინარე, მთელი ეს გარემო იერარქიზებულია და საფეხურებრივად გამოხატავს უზენაეს სიწმინდეს.

ზემოთ აღვნიშნეთ უფლის კვართის საქართველოში მცხოვრილი ელიოზის მიერ ჩამოტანის, მისი დის მიერ კვართის მირქმისა და გარდაცვალების შესახებ. ელიოზის და იქვე დაკრძალეს, სადაც მან უფლის კვართი მიიჩქვა². სწორედ იმ ადგილას ამოიზარდა ნაძვი ლიბანისა, რომლის მოკვეთის შემდეგ აღმართეს სვეტიცხოვლის ტაძარი, ვითარცა უმთავრესი ტაძარი სრულიად საქართველოსი.

ცხოველი სვეტის სიმბოლო განმარტებულია პავლეს პირველ ეპისტოლეში ტიმოთეს მიმართ: „ვითარ ჯერ-არს სახლსა შინა ღმრთისა-სა სლვაჲ, რომელ არს ეკლესიაჲ ღმრთისა ცხოველისაჲ, სუეტი და სიმტკიცე ჭეშმარიტებისაჲ“ (I ტიმ. 3,15). ღვთის სახლი, ცხოველი ღმრთის ეკლესია არის ჭეშმარიტების სვეტი და სიმტკიცე. პ. ფლორენსკის განმარტებით, „ჭეშმარიტების სვეტი არის ეკლესია, ერთ-არსება სამება, ნათელი დაუღამებელი, სიბრძნე ყოვლად პატიოსანი დედა ქალწული – ღვთისმშობელი“ (ფლორენსკი, 1990: 489).

„საკითხავსა“ და საბავშვებში „სუეტი ნათლისა“, „სუეტი ცხოველი“ ის მთავარი სვეტია, რომელიც სვეტიცხოვლის ტაძრის მშენებლობისას ადამიანთა ხელით არ აღმართულა, იგი ღვთის ნებით იქნა აღმართული ჰერში იმ ადგილას, სადაც უფლის კვართია დაფლული და სადაც იდგა ცხოველი ხე – ნაძვი ლიბანისა: „განაროდენ, სუეტო ქუეყანით ზეცად ამაღლებულო და ზე ჰერთა ტურთულო არა ნიეთთაგან კაცობრივთასა, არამედ კელითა ანგელოზთათა უხილავად, რომელი გუფარავ მარადის შენდაში მოღტოლვილთა“ (გულაბერისძე, 2007: 66).

სვეტიცხოვლის ტაძრის აშენება და მეშვიდე სვეტის, ვითარცა მთავარი სვეტისა, აღმართვა ნიკოლოზ გულაბერისძის თხზულებებში შედარებულია სოლომონის მიერ ტაძრის აგებასთან, ტაძრისა, სადაც ინახებოდა სჯულის კიდობანი, რომელშიც ორ ფიცარზე ორივე მხარეს წარწერილი ღვთის მიერ მოცემული ათი მცნება იყო დაცული. ამიტომ სვეტიცხოვლის ტაძარში დაფლული უფლის კვართი დაფარული ღვთაებრივი სიბრძნის ფლობას მიაჩნება.

ვიდეტური და ეიკონური სახისმეტყველების კვალობაზე, ცხოველი სვეტის სიმბოლოს უკეთ შესამეცნებლად წმ. გრიგოლ ნოსელის თვალსაზრისი კონცეპტუალური

2 ელიოზის დის მიერ უფლის კვართის მირქმად სახელდება პირველად ნანა გონჯილაშვილმა განსაზღვრა, როდესაც იგი დაინტერესდა ელიოზის დის სახელით, რომელიც სიღონად მოიხსენიება სამეცნიერო ლიტერატურაში და გაარკვია, რომ ელიოზის დის სახელი არც „მოქცევაჲ ქართლისაჲს“ ტექსტში, მისგან მომდინარე არც ერთ სხვა თხზულებაში არაა დასახელებული. დღეისათვის ჩვენთვის ცნობილი წყაროების მიხედვით, ელიოზის და სიღონის სახელით პირველად თეიმურაზ ბაგრატიონმა მოიხსენია (გონჯილაშვილი, 2011).

მნიშვნელობისა. წმ. გრიგოლ ნოსელი ცხოვრების ხეს და ცნობადის ხეს ცალ-ცალკე განმარტავს, რადგან მათს ფუნქციას განსხვავებულად აღიქვამს. „ხე ცხოვრებისა“ არის „ხატებად ღმრთისა“, ე. ი. სულიერი ცხოვრება, ხოლო „ხე ცნობადისა“ – „შეუნიერ ხილვითა“, ე. ი. მატერიალური ცხოვრება, რაც სიკვდილით დასრულდება; არის თუ არა სვეტი ცხოველი, მისი პირველსახე პარადიგმა „ხე ცხოვრებისა და ხე ცნობადისა“ ჰიპოდამასთან მიმართებით? ნაძვი ლიბანისა სვეტად ცხოველად იქცა მაშინ, როდესაც იგი ცეცხლოვანმა ჭაბუკმა აზიდა მალლა და ზეციდან ჩამოშვებული საქართველოს მთავარი ეკლესიის მთავარ ბოძად, მთავარ სვეტად გარდაისახა. მაცხოვრის კვართის დაფლვის ადგილას ამოზრდილი ნაძვი ლიბანისა და სვეტიცხოვლის მთავარი საყრდენი სვეტი, ცხოველი სვეტი ისე მიემართებიან ერთმანეთს, როგორც, ერთი მხრივ, ზეციური ადამი, მეორე მხრივ, ძე ღვთისა და ძე კაცისა//„მეორე ადამი“//მაცხოვარი, ან არმა-ზული და ქრისტიანული ეპოქები საქართველოს ისტორიის ჭრილში. ღმერთმა სამყაროს ძე ღვთისა და ძე კაცისა უბოძა როგორც მთავარი სვეტი, როგორც მთავარი საყრდენი ბოძი – ევანგელურ-აპოსტოლური სწავლებით, „სვეტი და სიმტკიცე ჭეშმარიტებისა“ (1 ტიმ. 3, 15), რომელსაც დაეყრდნო სვეტიცხოვლის ტაძარი.

სვეტი ცხოველში, მის პირველსახეში, მის პირველსახეში ერთდროულად მოიაზრება ხე ცხოვრებისა და ხე ცნობადისა, რადგან იგი იმ ლიბანის ნაძვის გადანაჭერი ხეა, რომლის ფესვებიც მაცხოვრის კვართს ქებოდა, მასთან ზიარებულია. სწორედ მაცხოვრის კვართმა აქცია მცხეთა ქართველთათვის „მეორე იერუსალიმად“, ზეციურ იერუსალიმად; ცხოველი სვეტის ზეციდან ცეცხლოვანი ჭაბუკის მიერ ჩამოსვეტების შედეგად მცხეთამ საკრალური მისია შეიძინა, რადგან ცხოველი სვეტი მარადიულობას სწვდება და მაცხოვრის აღდგომის სიმბოლოდ მოიაზრება. სვეტის სახით ჩამოშვებული ნაძვი ლიბანისა მაცხოვრის კვართის დაფლვის ადგილს მიუთითებს, რაც სხვათათვის დაფარული იყო, მხოლოდ წმ. ნინომ იცოდა იგი, იცოდა, როგორც ყოვლადწმინდა ღვთისმშობლის შთაგონებით წარმოგზავნილმა მოციქულთა სწორმა, ნიკოლოზ გულაბერისძის თხზულებით, მოციქულმა. როგორც ზემოთაც აღინიშნა, ბიბლიური მონათხრობით, სვეტი ნათლისა და სვეტი ღრუბლისა თეოფანიის ნიშანია, რაც მხოლოდ უფლის რჩეულთ ეუწყებათ.

ნიკოლოზ გულაბერისძის „საკითხავში“ სათაურშივეა სამი სიწმინდე აღნიშნული და მათზე ყურადღება გამახვილებული, საგალობლები კი უმეტესად ცხოველი სვეტის სიმბოლიკას ასახავენ. „სვეტი ცხოველი“ მცველია ქართველთა და საქართველოსი: „გისაროდენ შენ, სვეტო წმიდაო, ებგურო და მცველო ჩუენო და შეილთა შენთაო, რომელნი ჩუენცა შენითა დიდებითა ნეტარ ვიქმნებით“ (გულაბერისძე, 2007: 66). სვეტიცხოვლის ტაძარი თორმეტი მოციქულის სახელობისაა, რაშიც, აგრეთვე, სიმბოლური აზრია ჩაქსოვილი. „საკითხავის“ ტექსტში ჩართული წმინდა ჯვრის სასწაულთა შორის ყურადღებას იქცევს ერთ-ერთი, რომელიც მარტივილი და დღესასწაულზე ოთხშაბათ დღეს იხილეს: „სვეტი ერთი ნათლისაა სახედ ჯუარისა“ (გულაბერისძე, 2007: 43) და თორმეტი ვარსკვლავი, რომელთაც ირგვლივ ნათლის გვირგვინი შემორტყმობდა და ბრწყინადა, იდგა ჯვრის თავზე. თვით წმინდა ჯვარი, ნათლით შემოსილი, მაცხ-

ოვარია, ხოლო თორმეტი ვარსკვლავი თორმეტი მოციქულის სიმბოლოა. ყოვლადწმინდა ღვთისმშობელი, აგრეთვე, მოციქულია და სწორედ მას ხედა წილად საქართველოში ქრისტიანული სარწმუნოების ქადაგება, რაც პირველ საუკუნეში მოციქულმა წმ. ანდრია პირველწოდებულმა, ხოლო საბოლოოდ IV საუკუნის I ნახევარში წმ. ნინომ აღასრულეს. სვეტიცხოველი არის „საყოველი სახლი წმიდა დიდებისა ღმრთისა“, რომელიც „ცათა მობაძავია“. სახსიმეტყველებით ცა უფლის სამყოველია, იგი ღვთისმშობელიცაა სიმბოლური მოაზრებით. ტაძარი „ცათა მობაძავია“, რადგან ცაში მკვიდრობს, ტაძარი ღვთის სახლია. ძე ღმერთმა ყოვლადწმინდა ღვთისმშობელში, ქალწულ დედაში დაივანა, ამიტომაც იწოდება ღვთისმშობელი ხან ცად, ხან ცათა მობაძავად (მეტაფორასული— 1986: 103, 150; ფერემ მცირე, 1968: 83). ნიკოლოზ გულაბერიძის საგალობლებში ღმრთისმშობლისადმი მიძღვნილი ტროპარები ღვთისმშობელს სხვადასხვა სიმბოლოთი წარმოაჩენს, რომელთაგან უნდა გამოვყოთ სვეტი ნათლისა და სვეტი ცხოველი, რადგან მათ ღრმა სიმბოლური ფესვები აქვთ და საღვთისმეტყველო ლიტურატურაში სიმბოლურ-საკრალური მნიშვნელობა ენიჭებათ.

ნიკოლოზ გულაბერიძის „საკითხავსა“ და საგალობლებში „სვეტი ცხოველი“, „სვეტი ნათლისა“, „სვეტი ღრუბლისა“, „სვეტი ცეცხლისა“ სხვადასხვა სიმბოლური სახსიმეტყველებით დასტურდება. მათი ლიტურატურული საწყისი ბიბლიურია. „ნათლის სვეტი“, იგივე „ცეცხლის სვეტი“, და „სვეტი ღრუბლისა“ მიუძღვის ღვთის რჩეულ ერს აღთქმული ქვეყნისაკენ. ეგვიპტიდან მომავალ ებრაელებს „ღმერთი უძლოდა დღისი უკუე სუეტითა ღრუბლისადათა ჩუენებად მათდა გზასა, ხოლო ღამე სუეტითა ცეცხლისადათა და არა მოაკლდა სუეტი იგი ღრუბლისა და დღისი და სუეტი ცეცხლისა დაღე წინაშე ყოვლისა ერისა“ (გამოსლვ. 13, 21-22). მეწამულ ზღვასთან ებრაელებს უკან დაუდგა „სუეტი ღრუბლისა“, ვითარცა მცველი (გამოსლვ. 14, 19). ამავე დროს, „სვეტი ღრუბლისას“ უკან დგომა იმას მიუთითებს, რომ მათ უკან მიბრუნება ვერძალებათ, მხოლოდ წინ უნდა იარონ, რადგან უკან მიხედვაც კი დამლუპველია, „სვეტი ღრუბლისას“ პირისპირ ხილვა არ შეიძლება. ხოლო, რადგან განთიადისას ეგვიპტელებს პირისპირ წარუდგა „სუეტითა ცეცხლისა და ღრუბლისადათა“, ღმერთის პირისპირ ხილვამ დაღუპა კიდევ ისინი (გამოსლვ. 14, 24). რ. სირაძემ აღნიშნა, რომ სვეტი-ცხოველის სახე-სიმბოლო ქართულ მწერლობაში ამკვიდრებდა ეკონოურ, ხატისებრ სახსიმეტყველებას (სირაძე, 2008:). მიუხედავად ამისა, სვეტი-ცხოველის სახეს ეიდეტურ ხანაში წარმართული ხის სახით გვხვდებით — ხისგან შექმნა სვეტი ცხოველი, — ქართულ ჰაგიოგრაფიაში სვეტიცხოველი ნათლის სვეტია, ხატია, სიმბოლოა თავდაპირველი ბიბლიური „სუეტისა“ — ნათლისა, ცეცხლისა, ღრუბლისა. მის სახსიმეტყველებას ქართულ მწერლობაში, ზოგადად კულტურაში, ნათლის, მზის ესთეტიკა მსჭვალავს და წარმართავს, იგი ცხოველი სვეტის სიმბოლოსთან ღრმა, მისტიურ-სიმბოლურ კავშირშია, რადგან სვეტი ცხოველი ნათლის სვეტად ჩამოეშვა ზეციდან. ეს ნათლის სვეტი, ცხოველი სვეტი მაცხოვრის კვართლის დაფუძვის ადგილას იყო ამოსული და მისი ზეცასთან კავშირი წინასწარმეტყველური, განგებითი იყო.

„საკითხავში“ მოთხრობილია რამდენიმე სასწაული, რომელთა წინასახედ სწორედ

ის ბიბლიური ეპიზოდები მოიაზრებიან, რომელთა მიხედვით სვეტი ცეცხლისა/სვეტი ნათლისა და სვეტი ღრუბლისა მოუძღოდა აღთქმული ქვეყნისაკენ ებრაელებს. კერძოდ, შეიძლება მოვიხსნათ თვით ავტორის მიერ გადატანილი განსაცდელისას სვეტი ნათლისას შემწვობითა და წყალობით ადიდებული არაგვის გადალახვა და სამშვიდობოს გასვლა. ნიკოლოზ გულაბერისძემ სვეტიცხოვლის ერთ-ერთი სასწაულის აღწერისას შეიტანა ეპიზოდი თავისი ბიოგრაფიიდან; მას ავტობიოგრაფიის გადმოცემის მიზანდასახულობა არ ჰქონია; ეპიზოდის მიზანი იმ სასწაულის ასახვა იყო, თუ როგორ გადარჩნენ ნიკოლოზი და მისი მხლებელი მდინარის ადიდებისას ცხოველი სვეტის სასწაულებრივი წინამძღოლობით. მწერალი მიუთითებს, რომ მისი ბიძა, მამის ძმა სვიმონი, პატრიარქობამდე არმამში წმ. საბას მონასტერში მოღვაწეობდა. ახალგაზრდა ნიკოლოზი სწორედ თავის ბიძასთან მიდიოდა კახეთიდან არმამში: „„ვაჟა მას სიყრმისა ჩემისასა, რაჟამს იგი ნეტარი მამისძემა ჩემი სვმონ, პირველ პატრიარქობასა მისისა, მონასტერსა შინა იყო წმიდისა საბასსა არმამს, მაშინ უკუე მე კახეთით მოვიდოდე მის წინამე““ – (გულაბერისძე, 2007: 53). სასწაულში მოგვთხრობს იმის შესახებ, თუ როგორ გაიყვანა არმამს მიმავალი სრულიად ახალგაზრდა, სიყრმის ასაკში მყოფი ნიკოლოზ გულაბერისძე ზეცად აღწეულმა ცხოველმა სვეტმა სოფელ წიწამურთან („სოფელსა მას მახლობელსა არაგვსასა წიწამურს“ – გულაბერისძე, 2007: 53) ადიდებული არაგვის ერთი ნაპირიდან მეორეზე თავის თანმხლებ პირთან ერთად, რომელიც ღვინით დატვირთულ ცხენს მიუძღოდა. ეპიზოდის ჰიპოდიგმურ-პარადიგმული სახისმეტყველება ბიბლიიდან მომდინარეობს; სახისმეტყველებითად ესაა მოსე წინასწარმეტყველის მიერ ებრაელი ხალხის გამოყვანა ეგვიპტელთა მონობიდან და ღმერთის მიერ წითელი ზღვის განაპირის შედეგად სამშვიდობოს გასვლა. ამავე თვალსაზრისით მნიშვნელოვანია ეპიზოდი, რომელიც მოგვითხრობს სუჯვი/სოჯვი დედოფლის შესახებ, რომელმაც გამძვინვარებული და აბოპოქრებული მდინარე არაგვი გადალახა, როცა იგი კახეთიდან მოდიოდა მრავალრიცხოვან ერთან და ოჯახთან ერთად. სამშვიდობოს გასულმა მუსლმობურით მსურვალე მადლი შესწირა ცხოველ სვეტს გადარჩენისათვის. ნიკოლოზ გულაბერისძემ ეს ეპიზოდიც შეადარა მოსე წინასწარმეტყველის წინამძღოლობით ეგვიპტელთაგან დევნილი ებრაელების მიერ მეწამული ზღვის განაპირით გადალახვას. ნიკოლოზ გულაბერისძის მიერ დამოწმებულ ეპიზოდში სუჯვი/სოჯვი დედოფლის მამაცობის აღწერა მხატვრული თვალსაზრისით ერთ-ერთი ძლიერი ეპიზოდია: „ესე უკუე სასწაულნი, საყუარელნი, ისრაიტელთა მათ ზედა ქმნულისა სასწაულისა არარამთ უკუე უმცირეს არს, არამედ კინლა და უმეტესცა ვგონე, ვინამთგან იგი მდოვრად მდგომი ზღუა იყო, ხოლო ესე მქანარედ მავალი, ვითარცა მგელი განძუნებული, ხოლო ორივე ღმრთისა მიერი იყო“ (გულაბერისძე, 2007: 51).

ნიკოლოზ გულაბერისძის საგალობელი გვაუწყებს, რომ ნათლის სვეტი მიუძღოდა ეგვიპტის მონობიდან გამოსულ უფლის რჩეულ ერს აღთქმული ქვეყნისაკენ ორმოცი წლის მანძილზე: „ესე სუეტი ზემთა დიდებული ღვთისგანვე საცნაურ არს, რამეთუ ძუელ ოდესმე დიდსა მოსეს შორის მოგზაურობდა და ისრაელთა კეთილად უცდომელად ავლინებდა წინამძღოლითა ღმრთივ ბრწყინვალითა მიყოფრებელთა ჟამთა

ოთხ ათეულთა წელთასა უდაბნოსა მოქალაქეთა ისრაელთა ჯამიერად დგომისა და ლტოლვისა მაუწყებელ, უზრუნველ ექმნებოდა, ხოლო ამაღლესა და ფარაოს მგუემელ უწყალო საღმრთოთა მით განგებულებითა სასწაულთა საკურველთა იქმოდა, ხოლო აწ უზეშათეს მოქმედებს ყოველთა შორის ურწმუნოთა შემპუსტრელ, ხოლო მორწმუნეთა ძალ და ცხოვრება“ (გულაბერისძე, 2007: 67).

როდესაც სინას მთაზე ასვლის წინ მოსე კარაუმი შევიდა, „გარდამოჯდის სუეტი იგი ღრუბლისა და დადგის კართა თანა მის კარვისათა“ და ღმერთი ამცნობდა მოსეს მასთან მომავალ შეხვედრას. ამ დროს „შედიდა ყოველი იგი ერთ სუეტსა მას ღრუბლისასა, მდგომარესა კართა ზედა მის კარვისათა“ (გამოსლვ. 33, 9-10), „სუეტს ღრუბლისას“ თაყვანს სცემდა მოსე, რომელსაც ღმერთი აფრთხილებდა: „ვერ ძალგიც პირისა ჩემისა ხილვად, რამეთუ არა არს კაცი, რომელმან იხილა პირი ჩემი და ცხონდა“ (გამოსლვ. 33, 20. შდრ.: რიცხვ. 14, 14).

„ღრუბელი“, „ნისლი“, „ღამე“, ფილონ ალექსანდრიელიდან მოყოლებული, თითქმის ყველა ღვთისმეტყველს აქვს განმარტებული. ღრუბელი და ნისლი არის ღმერთის მიუწვდომლობის სიმბოლო; ღმერთი, რომელიც არის ნათელი, ნათელზე უზესთაესი, ადამიანს ეჩვენება წყვიდად, გაუმჭვირვალედ. ღრუბელი წინასწარმეტყველური ხილვაა, გამოსლვათა წიგნის მიხედვით, იგი ღმერთის გამოცხადებაა ალქმული (19, 20-24; თავი 33), რომელიც გახდა დასაბამი, საწყისი სხვა ბიბლიურ წიგნებში ასახული ნათლის, ღრუბლის, ნისლის სიმბოლიკისა. ქრისტეს მოწაფეებს ღრუბლიდან და ნისლიდან ესმით ღმერთის ხმა: „ესე არს ძე ჩემი საყვარელი“ (მთ. 17, 5).

ფილონ ალექსანდრიელმა ღმერთის შესაცნობად სმენაზე მაღლა ჭვრეტა, სულიერი ხედვა დააყენა. მისივე განმარტებით, თუ ბერძნებისათვის სამყაროს აღსაქმელად ყველაზე მაღალი გრძნობა არის ხედვა, მხედველობა, ებრაელებისათვის ღმერთის შესაცნობად ყველაზე მნიშვნელოვანი და ყოვლისმომცველი საშუალებაა ღმერთის ხმის მოსმენა. ფილონ ალექსანდრიელმა თავისი შესხედულება დაამყარა გამოსლვათა წიგნში გამოთქმულ იმ თვალსაზრისს, რომლის მიხედვით, „ყოველი ერთი ხედვიდა ემასა და ლამპართა და ემას საყვირისსა და მთად მკუმოლვარე იყო, ხოლო შემინებულნი ყოველნი ერნი დგეს შორს“ (გამოსლვ. 20, 18), აგრეთვე: „და თქუა უფალმან მოსეს მიმართ: ესე პრქუნე სახლსა იაკობისსა და მიუთხრნე ძეთა ისრაელისათა: თქუნ იხილეთ, რამეთუ ცით გამო ვიტყოდე თქუნდა მიმართ“ (გამოსლვ. 20, 22). ფილონი იქვე განმარტავს, რომ ყოველი მოკვდავი ნივთის ხმა სმენით შეიცნობა, მაგრამ ღვთის სიტყვა სინათლესავით, ნათელივით უნდა განჭვრიტოს ადამიანმა. ა. ლოსევა ფილონის ამ ნააზრევში ესთეტიზმი დაინახა (ლოსევი, 1980: 103-104).

ღრუბელი, ნისლი სიმბოლური და ალგორიული სახეებია, როგორც ხატი ღვთისა. კლიმენტი ალექსანდრიელი მათ ღმერთის უხილავობის სიმბოლოდ მოიხმობდა. ღრუბელი მაღავს თვალისათვის იმას, რის ხილვასაც ადამიანის თვალები ვერ უძლებენ, მათ შესაძლებლობებს აღემატება. ამ თვალსაზრისით მეტად ნიშანდობლივია სინას მთისაკენ მიმავალი მოსეს შესვლა ნისლში, როგორ გატყუა იგი მასში და უხილავი გახდა ებრაელთათვის. ნისლი ღმერთის ერთ-ერთი სიმბოლოა („ხოლო მოსე შევიდა

ნისლსა, სადა იყო ღმერთი“ – გამოსლვ. 20, 21). წმ. გრიგოლ ნაზიანზელმა მოსეს შესვლა ღრუბელში მისი მატერიალურიდან, გრძობადობიდან გამოსვლად განმარტა. წმ. გრიგოლ ნოსელმა – უთქმელის განჭვრეტად (ლოსვეი, 1980: 103-104), უხილავის ხილვად, გამოუთქმელის აღქმად მიიჩნია, რადგან ღმერთი არ მალავს თავის დიდებას წყვილადში, იგი ამ წყვილადს ანათებს. ღამე ის ღრუბელია, სადაც მოსე შედის და წყვილადი, რომელიც არის საფარველი ღმერთისა. ქრისტიანული მისტიციზმი, დაწყებული ფილონ ალექსანდრიელიდან, ღამეს, ღრუბელს, ნისლს განმარტავს, როგორც ღმერთის ხილვის საშუალებას, წინასწარ დაბრკოლებას წმინდა ნათელის ხილვაში (ლოსვეი, 1980: 103-104).

„სვეტი ღრუბლისა“, „სვეტი ცეცხლისა“, რომლებიც დღისით და ღამით მიუძღვით ეგვიპტიდან გამოსულ ებრაელებს აღთქმული ქვეყნისაკენ, ღმერთის სიმბოლოებია. ცეცხლი ქრისტეს ჰიპოდიმური სახეა, რაც მოსეს მიერ აღმოდებული მაცელის ხილვაში (გამოსლვ. 3, 2-5) გამოვლინდა. ნიკოლოზ გულაბერისძის „საკითხავი“ და საგალობელი ასახავს ამ მოტივს: „ესე სვეტი, ისრაიტელთა უდაბნოს ოთხ ათეულთა წელთა ანაყოფებდა წინაძღომითა უცთომელითა, მართებით ავლინებდა ესევე თაბორს და იორდანეს“ (გულაბერისძე, 2007: 68). ღრუბელი, ღვთისმშობლის სიმბოლოცაა, ხოლო „ღრუბელი სულმცირე“ მხოლოდ ღვთისმშობლის სიმბოლოა, რასაც ხშირად სწორედ ამ გააზრებით იყენებენ ჰიმნოგრაფები. ყოველივე ეს იმას მიუთითებს, რომ „სვეტი ღრუბლისა“ და „სვეტი ცეცხლისა“ სიმბოლურ და ალგორითულ განმარტებასა და აღქმას მოითხოვენ. ორივე სიმბოლო იმ რიგისაა, რომლებიც ღმერთსაც და ღვთისმშობელსაც აღნიშნავენ, რადგან ზემოხსენებული ბიბლიური სახსიმეტყველებით (გამოსლვ. 3, 2-5), ცეცხლი ქრისტეს, ღმერთის სიმბოლოა, „სვეტი ცეცხლისა“ (აგრეთვე „სვეტი ღრუბლისა“) ღმერთის სიმბოლოა. ნიკოლოზ გულაბერისძის საგალობელი ასახავს ბიბლიურ მოტივს, რომლის მიხედვით ფარაონისაგან ლტოლვილ ებრაელებს ღმერთი ცეცხლის სვეტით უჩვენებდა გზას: „ყრმანი ებრაელნი, ლტოლვილნი ფარაონ მეფისაგან, უდაბნოსა შინა ცეცხლისა სვეტითა უცთომელად ვიდოდეს და იტყოდეს: კურთხეულ ხარ შენ“ (გულაბერისძე, 2007: 80).

როგორც ზემოთაც აღვნიშნეთ, „სვეტი ცხოველი“ დაკავშირებულია ბიბლიურ სიმბოლოებთან „სვეტი ღრუბლისა“, „სვეტი ცეცხლისა“, „სვეტი ნათლისა“, რომლებიც ღმერთის სიმბოლური სახელებია ძველ აღთქმაში. ლ. გრიგოლაშვილმა „სვეტი ცხოველს“ და „სვეტი ნათლისას“ დაუკავშირა „ბერი კაცი“ და „ძუელი ღლეთა“, რომელთა ასახსნელად მან დაიმოწმა დანიელის წინასწარმეტყველების სიბრძნე. დაკვირვების საფუძველზე მან დაასკვნა, რომ ესაა ღმერთის სიმბოლო. მისი სიტყვით: „ძუელი ღლეთა“ და „ბერი კაცი“ ღვთაების ერთსა და იმავე ასპექტზე მიუთითებენ და ამიტომ იხილვების „სვეტი ნათელი, ვითარცა ძუელი ღლეთა“. გულაბერისძე ჩამოთვლის იმ ადამიანებს, „რომელნიცა ღირს არიან ხილვისა მისისა“ და მათ შორის ასახელებს დავით აღმაშენებელსაც (გრიგოლაშვილი, 2005: 94). რ. სირაძემ ნიკოლოზ გულაბერისძის „საკითხავის“ ტექსტზე დაკვირვებით განაცხადა, რომ „სვეტი ცხოველი“, ანუ ნათლის სვეტი, გამოხატავს „ძველ ღლეს“, რომელიც სიმბოლურად მამა ღმერთს აღნიშნავს,

„რაც ამ ნაწარმოების მთელი სიმბოლური შინაარსის გასაგებად განსაკუთრებულ ყურადღებას იმსახურებს“ (სირაძე, 1992: 111). ამავე პრობლემის განხილვა შემოგვთავაზა ლ. წერეთელმა თავის წერილში დავით აღმაშენებლისეული ხილვის შესახებ, რომლის მიხედვით მეფეს ღმერთი გამოეცხადა, როგორც „მოსუცებელი ვინმე სახედ ძუელისა დღეთაჲსა“, და დავით გურამიშვილის „ძველი დღის“ სიმბოლური გააზრების შესახებ (წერეთელი, 2005: 143-145). საგულისხმოა, რომ საგალობელში ნახსენებია „სუეტი ძუელი“, რომელიც ებრაელებს წინ უძღოდა ოთხი ათეული წლის მანძილზე და მოსეს წინამძღოლობით „უცთომელად“ ატარებდა. „სუეტი ძუელი“ ერთდროულად არის მამა ღმერთი და ის სვეტი, რომელმაც შეძღვეში, ახალი აღთქმის ეპოქაში, ძე ღმერთის სიმბოლური ხატ-სახე უნდა მიიღოს.

„საკითხავსა“ და საგალობლებში ღმერთი სხვადასხვა სიმბოლური სახელით იხსენიება. შეიძლება დავასახელოთ „უფალი უფლებათა“, „ძუელი დღეთა“, „სუეტი ნათლისა“ და სხვანი, რაც ევანგელური და საღვთისმეტყველო სწავლებებიდან მომდინარეობს. მათი რაობის წვდომა ადამიანის დასაზღვრული გონებისათვის შეუძლებელია, მაგრამ მთავარი ისაა, რომ ღვთისმეტყველთა ნააზრევში მოცემული ყოველი განმარტება მათი სიმბოლური და სახისმეტყველებითი გააზრების საფუძველს იძლევა.

ნიკოლოზ გულაბერიძის „საკითხავსა“ და საგალობლებში „სუეტი ნათლისა“ მრავალმნიშვნელობიანია და იგი რამდენიმე სიმბოლურ სახედ მოიაზრება:

ა) „სუეტი ნათლისა“ სამების სიმბოლოა და იგი სახეა სვეტი ცხოველისა: „სამებასა წმიდასა, სამებით მნათობიერსა, უგალობდეთ, ვაქებდეთ, რამეთუ სახე ნათლისა მისისა სუეტი ცხოველი გამოგვცხადა მორწმუნეთა“ (გულაბერიძე, 2007: 69).

ბ) ყოვლადწმინდა ღვთისმშობლისადმი მიძღვნილ ტროპარში „სუეტი ნათლისა“ არის ქრისტესა და ღვთისმშობლის სიმბოლო: „მ, დედაო და ქალწულო, ნათულო, ნათლის სუეტისა მსახეებულო, ხოლო სუეტად სახელდებულო, რომელსაცა შიშით გადიდებენ ქერობინნი და ჩუენცა მათ თანა ძრწოლით გივგალობთ და გაქებთ დაუცხრომელად“ (გულაბერიძე, 2007: 70). ტროპარი რთული სახისმეტყველებითი აზროვნებით გამოირჩევა, მასში „სუეტი“, ერთი მხრივ, ქრისტეს სახეებაა, მეორე მხრივ, იგი ღვთისმშობლის სიმბოლოა.

გ) საგალობელში სხვაგანაც არის „სუეტი“ საღვთისმშობლო სიმბოლურ სახელად მოხმობილი: „ყოვლადწმიდაო ღვთისმშობელო, წინასწარმეტყველთა და მამათაგან სუეტად ნათელად ცეცხლისად წმიდად და უბიწოდ მოსწავებულო“ (გულაბერიძე, 2007: 68).

დ) „სუეტი ნათლისა“ სვეტიცხოვლის ტაძრის მთავარი სვეტის სიმბოლოა: „ყრმანი ბომონსა მის არმაზისასა დაიკლოდეს, ხოლო აწ სუეტსა წინაშე ნათლისასა ნათელსიღებენ და ღაღადებენ: კურთხულ ხარ შენ“ (გულაბერიძე, 2007: 80).

ნიკოლოზ გულაბერიძე „საკითხავში“ მოგვითხრობს, რომ მირიან მეფემ გაუმართლეს ბლად მიიჩნია უფლის კვართის ადგილზე აღმართული ცხოველი სვეტის მოურიდებლად შეხება ხალხის მხრიდან, ზოგჯერ ურწმუნოთა შეხებაც, ვიდრე იგი ჩვეულებრივად იხილებოდა თვალთ, და იგი სიწმიდის ხელმეუხებლობის, დაცვის აუცილებლობის

გამო ფიცრით დაფარა, ხოლო მასთან რწმენით მისვლა ყველას შეეძლო და ყველას მიემადლებოდა ის, რაც სურდა. მოგვიანებით, როდესაც ფიცრის არამდგრადობის გამო სრულიად გაშიშვლდა წმიდა სვეტი ცხოველი, წმ. მეფე მირიანის ძემ რევმა გადაწყვიტა ქვითკირით ამოშენება კვართის დაფვლის ადგილისა და მეშიფდე სვეტის აღმართვის ადგილისა მისი დაცვის მიზნით. მისი დაფარვის მიზანი ის რწმენა იყო, რომ ფიზიკური შეხება კი არაა მთავარი, არამედ მასთან რწმენით მისვლა! დავიმოწმებთ ტექსტს: „რევ, ძე მირიან მეფისაჲ, შეშინდა უკუე მეფობასა შინა მისსა, ნუუკუე სრულიად განშიშვლდეს სუეტი იგი წმიდაჲ სამარადისოჲსაგან ფიცართა მათ და ნათლისა და წარპარვისა და ამის მიზეზისათჳს განიზრახა, რამთა სრულიად ქვითკირითა აღმოქმნას გარემო სუეტისაჲ მის, რომელიცა უკუე ესე საქმით შეუდგინა განზრახვასა და სრულყო. და ესრეთ ვიდრეჲმე ჰკიეს მოდღეინდელად დღედმდე, რამეთუ ურიცხვნი და უფროასლა სასწაულნი მაშინცა იქმნნეს, რაჲამს-იგი მოსდეს გუამსა მას სუეტისა ცხოველისასა და შემდგომითი-შემდგომად არაოდეს მოკლებულ არიან სასწაულნი და დიდებულენი სუეტისა ცხოველისანი სამარადისონი, უკუეთუმცა რამ ვის ყოფლად ჰქონებოდა გულისკმის-ყოფად მგონებლობით აღწერა უმჯობესისათჳს სათანადოდ მრჩობლ ორკრძოთავე საცხორებელთა – სულ – სხეულობითთა, შემდგომისათჳს უამის სასარულევანად სულთა სასუფეველისა ტრფიალთა, რამთა შემდგომნი ნათესაენი წარკითხვითა მათითა ნათელმოყოფელსა სულისასა ნუგეშინისცემასა მოირეწოდენ“ (გულაბერისძე, 2007: 48-49). ნიკოლოზ გულაბერისძის საგალობლის მიხედვით, „სუეტი ცხოველი“ მცველია ქართველებისა და საქართველოსი: „გვიხაროდენ შენ, სუეტო წმიდაო, ებგურო და მცველო ჩუენო და შვილთა შენთაო, რომელნი, ჩუენცა, შენითა დიდებითა ნეტარ ვიქმნებით“ (გულაბერისძე, 2007: 66).

მწერალი შენიშნავს, რომ ბევრს გასჩენია ნაკლებმრწმენობის შედეგად კითხვა იმის შესახებ, თუ რა არის ამ კონქში დაფარული. ამასთან დაკავშირებით ნიკოლოზ გულაბერისძე მოგვითხრობს ცხოველი სვეტის ერთი სასწაულის შესახებ, რომელიც წმ. მეფე დავით აღმაშენებელს გადახდა თავს და რამაც დავითის თანამედროვეთა ყურადღება მიიპყრო. ნიკოლოზი გვიამბობს, რომ დავით აღმაშენებელი ერთხანს განდრეკილობდა და ანტიერესებდა, თუ რა იყო ამ კონქში, რომელსაც ხალხი თაყვანს სცემდა. ღამით მან ნახა ჩვენება, რასაც მწერალი სახისმეტყველებითად აღწერს:

„ხოლო მას ღამესა მირულეებულსა ერუნა ესე სახედ, ვითარმცა ამას სუეტსა ზედა ზე თავსა მჯდომარე იყო მოსუცებული ვინმე სახედ ძუელისა დღეთაჲსა და ბრწყინვალეებისაგან ნათლისა მის, რომელ მანთნი ცეცხლისანი ჰკრთებოდეს ელვის სახედ, თუალნი კაცობრიენი ვერ შემძლებელ იყენეს განცდად პირსა მისსა ყოვლადვე, და ვითარ განკვრებულ იყო ხილვასა მისსა მეფე შეშინებული, კმაყო მან ზეღამთ საშინელებით და ჰრქუა:

– დავით, დავით, არა უწყია, თუ ვინა ვარ აქა შინა, რომელსა-ესე მხედვე? და ესე უწყოდე შენ და ყოველთა, რამეთუ რომელსა აქუნდეს სასოებაჲ ჩემდა მომართ მტყიცე, არაოდეს სირცხვლეულ იქმნეს და ნუ ურწმუნოებ ჩემდა მომართ ყოვლადვე, რამეთუ რომელნი ურწმუნოებდენ, მიიღონ თავისა თჳსისა სასჯელი“ (გულაბერისძე, 2007: 55-56).

დავით მეფე ღამითვე გაუდგა გზას ნაჭარმაგვეიდან სვეტიცხოვლისაკენ და დილადრიან მივიდა ტაძარში, მუხლმოდრეკილი ცრემლებით აღტობდა იატაკს და შენდობას ითხოვდა ღვთისაგან. კათოლიკოს-პატრიარქი იოანე და სხვა სასულიერო პირებიც მეფესთან ერთად ლოცულობდნენ. ამ სასწაულზე ყურადღება გაამახვილა ლ. გრიგოლაშვილმა წმიდა დავით აღმაშენებლის საგალობლის ანალიზისას (გრიგოლაშვილი, 2005: 95). იგი განიხილა ლ. წერეთელმა, რომელმაც საგულისხმო ინტერპრეტაცია მისცა ხსენებულ ეპიზოდში საღვთო სახელს „ძუელი დღეთა“ (წერეთელი, 2005: 143-145). მან იგი სამების სიმბოლურ-სახისმეტყველებით სახელად მიიჩნია და, აქედან გამომდინარე, წმინდანი მეფის ხილვაში წარმოსახული „მოხუცებული ვინმე სახედ ძუელისა დღეთაჲსა“ სამებად გაიაზრა. ყველა ეს ეპიზოდი სასწაულის აღწერას, მისი სახისმეტყველებითი ფუნქციის წარმოჩენას ემსახურება.

ასევე გამოყენებული ნიკოლოზ გულაბერისძის „საკითხავში“ მისი ცხოვრების ამსახველი ეპიზოდის გადმოცემისას საღვთო სახელად „მოხუცებული ბერიკაცია“. პროველი ეპისკოპოსის ტიმოთეს კურთხევისას ეპისკოპოსთა კურთხევის წესის დარღვევის შემდეგ ერთმა სარწმუნო ღვთისმოყვარე კაცმა ჩვენება ნახა და ღმერთი წარმოესახა „სახედ მოხუცებულისა ბერიკაცისა“.

ამრიგად, ნიკოლოზ გულაბერისძის „საკითხავისა“ და „გალობანი სუეტისა ცხოველისანის“ მიხედვით, „სუეტი ნათლისა“, „სუეტი ცხოველი“ პოლისემიურ სიმბოლოდ მოიაზრება. იგი არის 1. „შეერთებულისა ღმრთისმეტყველების“ მიხედვით, ღმერთის, სამების სახე-სიმბოლო; 2. „განყოფილისა ღმრთისმეტყველების“ მიხედვით, მამა ღმერთი; 3. ამავე პრინციპის მიხედვით, ქრისტე – ძე ღმერთი; 4. ყოველდღე წმინდა ღვთისმშობელი; 5. სვეტიცხოვლის მთავარი სვეტი, რომელიც მხოლოდ ღვთის ნებითა და წმიდა ნინოს ლოცვით, ძალისხმევით აღიმართა; 6. „სუეტი ნათლისა“, „სუეტი ცხოველი“ სიმბოლურად მცველია საქართველოსი და ქართველებისა; 7. დასასრულ, სვეტი ცხოველი ეწოდა საქართველოს მთავარ ეკლესიას, აღმართულს ქრისტეს კვართის დაფლვის ადგილზე.

აქვე ისიც უნდა აღინიშნოს, რომ სვეტი ნათლისა, სვეტი ღრუბლისა ქართულ (სხვა ქვეყნების) ჰაგიოგრაფიაში თეოფანის გამოხატულებათა, რასაც მოწმობს თითქმის ყველა ქართული ჰაგიოგრაფიული თხზულება. განსაკუთრებული ღირებულებისაა ამ თვალსაზრისით იოანე საბანისძის „წმ. აბო თბილელის წამება“ და გიორგი მერჩულის „წმ. გრიგოლ ხანცთელის ცხოვრება“. საინტერესო ისაა, რომ ნათლის სვეტი, ღრუბლის სვეტი საერო მწერლობაშიც უმეტესად რელიგიური თვალხედვითაა დატვირთული და იგი მაცხოვრის ხატ-სახეს უკავშირდება. ამ თვალსაზრისით გამოირჩევიან შოთა რუსთაელის „ვეფხისტყაოსანი“ და დავით გურამიშვილის „დავითიანი“.

3. ზემოთ აღვნიშნეთ, სვეტიცხოვლის ტაძარი თორმეტი მოციქულის სახელობისაა, რასაც, აგრეთვე, სიმბოლური მნიშვნელობა აქვს, ვინაიდან ღვთისმშობელი, აგრეთვე, მოციქულია და სწორედ მას ხვდა წილად საქართველოში ქრისტიანული სარწმუნოების ქადაგება, რაც პირველ საუკუნეში წმ. ანდრია მოციქულმა და IV საუკუნეში წმ. ნინომ აღასრულეს.

რ. სირაძის სიტყვის თანახმად, სვეტიცხოვლის ტაძარი, „ქართველთა მიერ აშენებული, სულიერად გააზრებული მთელი სამყაროს პირველ წმინდა განსახოვნებად იქცა“ (სირაძე, 2000: 20).

ყოვლადმეცნიერულად იქცევა ის ფაქტი, რომ სვეტიცხოვლის ტაძარს უწოდებენ სიონსაც, რაც სიმბოლურადაა გასააზრებელი. ესაია წინასწარმეტყველი ამბობს: „მოვიდეს სიონით მქსნელი და მოაქციოს უღმრთოებისაგან იაკობი“ (ეს. 59, 20), რომლის ლოგიკური გაგრძელებაა მისივე სიტყვები: „...უკუთუ იღმო დედაკაცმან ერთსა შინა დღესა, ანუ იშუა ნათესავი ერთგ ზის, რამეთუ იღმო და შინა სიონმან ყრმანი თჳსნი“ (ეს. 66, 8).

წმ. ანდრია კრიტელმა თავის თხზულებაში „შობისათჳს ღვთისმშობლისა“ ყოვლადწმინდა ღვთისმშობლის სახელად მიიჩნია ესაიას წინასწარმეტყველებაში ნახსენები სიონი: „და გამოირჩია უფალმან სიონი და სათნო-იყო სამკვდრებელად იგი“ (მეტაფრასული... 1986: 149), რაც ფსალმუნთა სიტყვებსაც ეხმიანება: „დედად სიონსა ჰრქუას კაცმან, რამეთუ კაცი იშუა მას შინა და თავადმან დააფუძნა იგი მაღალმან“ (ფს. 136, 5).

უფლისაგან სიონის გამორჩევა თავის სამკვიდრებლად სახსიმეტყველებითი თვალსაზრისით ყოვლადწმინდა ღვთისმშობლის წიაღში იესო ქრისტეს დავანების წინასახეა; ფსალმუნში ნათქვამიც ასევეა გასააზრებელი, ვინაიდან სიონს დედას უწოდებენ.

სამეცნიერო ლიტერატურაში მიუთითებენ, რომ სვეტიცხოვლის ტაძრის ორმაგად მოხსენიება – სიონი და თორმეტი მოციქულის სახელობისა – იერუსალიმის იმ ეკლესიის სახელწოდებებს იმეორებს, რომელიც სიონის ბორცვზეა აგებული და სადაც, გადმოცემით, ის სახლი მდგარა, რომელშიც მოციქულები შეიკრიბნენ სულიწმიდის მოფენისას, ამიტომაც ატარებდა იგი ორ სახელწოდებას – სიონსა და მოციქულთას, და, როგორც პირველნაგები ეკლესია, იწოდებოდა „დიდებულ სიონად, დედად ყოველთა ეკლესიათა“. ასევე, მცხეთაში პირველნაგებული ეკლესია – სვეტიცხოველი საქართველოსთვის არის „დედა ყოველთა ეკლესიათა“ და „დიდი სიონი“. აქედან გამომდინარე, ნათლად წარმოჩნდება მცხეთის, როგორც მეორე იერუსალიმის, ანუ ქართველთა იერუსალიმის, კულტუროლოგიური მნიშვნელობა ჩვენი ქვეყნის ისტორიაში, რაზეც ზემოთ უკვე ვისაუბრეთ. მიტროპოლიტმა ანანია ჯაფარიძემ შენიშნა, რომ მცხეთის ეკლესია ზოგჯერ საქართველოს სინონიმადაც გამოიყენებოდა, საქართველოს საპატრიარქო ზოგჯერ მცხეთის ან სვეტიცხოვლის საპატრიარქოდ მოიხსენებოდა (ჯაფარიძე, 1998: 171-172). ზემოთ დავიმოწმეთ რ. სირაძის აზრი, რომ „სვეტიცხოველი თორმეტი მოციქულის სახელობის ტაძარი იყო, მაგრამ მას ერქვა „სიონი“. საქართველოში „სიონი“ ეწოდებოდა ღვთისმშობლის ტაძარებს. ნიკოლოზ გულაბერისძე აღნიშნავს საქართველოს წილხვდომილობას ღვთისმშობლისადმი („ნაწილიცა იყო დედისა ღმრთისა“). ღვთისმშობელი ჩვენში წამოსასვლელად „განმზადებულ“ იყო, მაგრამ „ქემან და ღმერთმან მისმან დააყენა ამის საწადელისაგანო“, ხოლო ღვთისმშობლის მისია წმ. ნინოს დაეკისრა.

ქართული წერილობითი წყაროების მიხედვით, წმ. ნინო ყოვლადწმინდა ღვთისმშობლის ნაცვლად ავრცელებს ქრისტიანობას, ყოვლადწმინდა ღვთისმშობლის შთაგონებით წამოვიდა საქართველოში ქრისტიანობის საქადაგებლად. ამიტომ იგი მიჩნეულია არა მოციქულთა სწორად, არამედ, ზოგიერთი გვიანდელი ქართული წყაროს მიხედვით, მო-

ციქულადაც, რომელსაც მაცხოვარმა, იესო ქრისტემ, ძე ღმერთმა მიანიჭა მოციქულება ყოვლადწმინდა ღვთისმშობლის მეშვეობით. ნიკოლოზ გულაბერისძე მისდევს ქართულ მწერლობაში დამკვიდრებულ ტრადიციას წმ. ნინოს მოციქულად მიჩნევის შესახებ. სახელდობრ, იგი ეყრდნობა წმ. ნინოს „ცხოვრების“ მატერიალულ-ჭვლიტურ რედაქციას, რაც შენიშნული აქვს რ. სირაძეს. ამ რედაქციაში შემონახული ტრადიცია მომდევნო ხანებში შექმნილ ჰიმნოგრაფიულ თხზულებებშიც პოულობს ასახვას. ამიტომაც სიბოლღურია ის ფაქტი, რომ სვეტიცხოვლის ტაძარი თორმეტი მოციქულის სახელობისაა, საქართველო ღვთისმშობლის წილხვედრი იყო ქრისტიანობის გასაფრცვლებლად, ზოლო წმ. ნინო ახალი მოციქულია, რომელმაც ღვთის შეწვევით აღმართა ცხოველი სვეტი, ბრწყინვალე და ნათელი დედაბოძი. რ. სირაძის სიტყვით, „მოციქულებრივი იდეით სვეტიცხოვლის ტაძარს და უპირველესად სრულიად საქართველოს უკავშირდება ღვთისმშობელი, რომლის მონაცვლეა წმინდა ნინო“ (სირაძე, 1992: 109-135) და ამიტომ იგი საგალობლებში მოციქულად მოიხსენიება. ეს ტრადიცია გააგრძელა XIII საუკუნის I ნახევრის საქართველოს კათოლიკოსმა, ჰიმნოგრაფმა არსენ ბულმბისიძისძემ და წმ. ნინოსადმი მიძღვნილ საგალობელს უწოდა „გალობანი წმიდისა მოციქულისა ნინოსანი“.

ნიკოლოზ გულაბერისძის თხზულებებში სრულყოფილად წარმოსახება წმ. ნინოს მოციქულობა, ცხოველი სვეტის უხილავად აღმართვა საუფლო კვართის ადგილზე და „ცათა მობაძავი“ ტაძრის აგება.

ნიკოლოზ გულაბერისძე საგალობელში გვაწვდის ცნობებს წმ. ანდრია მოციქულისა და წმ. ნინოს მოღვაწეობის შესახებ, როგორც საქართველოს განმანათლებელთა შესახებ: „*ვითარცა ორთა ქადაგთა სახეთა მდინარისათა დიდმან ანდრეა და ღირსმან ნინო წარრღუნეს ყოველი სიხენეშჳ კერბთაჲ ქართველთა თემისა. ვგრე სახედ ესე ორნი მდინარენი წარპრღუნან ყოველსა სიბილწესა და კეთილსა ნაყოფსა რწყვენ დაუცხრომელად*“ (გულაბერისძე, 2007: 68). ნიკოლოზ გულაბერისძე ამ კონტექსტით ერთდროულად აღნიშნავს ქართველი ერის რჩეულობის, ცხებულების რამდენიმე ნიშანს: 1. საქართველოს ხედა პატივი უფლის კვართის მის მთავარ ტაძარში მთავარი სვეტის ადგილას დაეანებისა; 2. საქართველოს ეკლესია სამოციქულოა, აქ იქადაგა წმ. ანდრია მოციქულმა; 3. საქართველო ღვთისმშობლის წილხვედრილია და, აქედან გამომდინარე, მას სულიერ მემკვიდრედ ჰყავდა ქალი, წმ. ნინო. საქართველოს ღვთისმშობლისადმი წილხვედრილობა ჩვენამდე მოღწეულ თხზულებათაგან პირველად „ილარიონ ქართველის ცხოვრებაში“ დასტურდება, რაც კორნელი კეკელიძემ განიხილა ნაშრომში „*კულტურული დამოუკიდებლობისათვის ბრძოლის ანარკელი ძველ ქართულ ლიტურატურაში*“ (კეკელიძე, 1957: 116). ღვთისმშობელი ქართველი ერის შესახებ ამბობს: „და რომელნი მათ არა შეიწყნარებენ, მტერ ჩემდა არიან, რამეთუ ჩემდა მონიჭებულ არს ძისა მიერ ჩემისა ნათესავი იგი შეურყვევლად მართლმადიდებლობისათჳს მათისა“ (ძეგლები, 1967: 21). ქართველი ერის ღმერთისაგან ცხებულება საგანგებო ცნებითაც არის გამოხატული X-XIII საუკუნეების მწერლობაში – „*ერი საზეპურო*“ (ამ ტერმინის შესახებ იხ. გულაბერისძე, 2007: 109-123). ნიკოლოზ გულაბერისძე

წერს: „გიხაროდენ, მომგებლო ერად საზეპუროდ ნათესაედ წმიდად და სამეუფოდ“ (გულაბერისძე, 2007: 68).

ნიკოლოზ გულაბერისძის „საკითხავისა“ და საგალობელთა მიხედვით, როგორც ძველი აღთქმის ეპოქაში ისრაელი იყო რჩეული ერთი ღმერთისა, გაქრისტიანების შემდეგ, სხვებთან ერთად, ღმერთმა ქართველი ერთი გამოარჩია „ერად საზეპუროდ“, რაც გამოიხატა საქართველოში, მცხეთაში, კერძოდ, უფლის კვართის დაფუძნის ადგილას ცხოველი სვეტის აღმართვით, ხოლო შემდეგ ქვეყნის უპირველესი ტაძრის, „ცათა მობადავი“ ტაძრის აგებით, რომელიც ღვთაებრივი ნათლითაა გაბრწყინებული. ღვთაებრივი ნათლის სვეტის ჩამოშვებით შიორჩა და გამოჩნდა უფლის კვართის სამკვიდრებული ადგილი, რომელიც წმ. ნინოს მოსვლამდე უზინარი და უცნობი იყო. წმ. ნინოს მინიშნებით, რაც მას ღმერთისაგან უუწყა, მიკლუელ იქნა უფლის კვართის დაფუძნის წმინდა ადგილი ღვთის სახლის ასაგებად. ყოველივე ზემოთქმული ნათლად აჩვენებს, განვითარების რა საფეხურები განვლო ეროვნულმა და ქრისტიანულმა ცნობიერებამ, როგორ აისახა და როგორ განვითარდა მესიანური იდეა საუკუნეთა მანძილზე.

ნიკოლოზ გულაბერისძე „საკითხავსა“ და საგალობლებში მესიანური იდეების წარმოსახვით თავისი ეპოქის, თამარის ეპოქის სულისკვეთებას ეხმიანება და ეროვნული ცნობიერების განვითარებაში დიდი წვლილი მიუძღვის. მართალია, მესიანიზმი თავისი არსით კაცობრიობის მსხნელზეა ორიენტირებული, მაგრამ, სხვა ქვეყნების დარად, საქართველოშიც ეროვნულ კონცეფციად ჩამოყალიბდა. მისი განვითარება და არსებობა ქართული ეროვნული ცნობიერების გამოკვეთას მიუთითებს, იგი იმის დასტურიცაა, რომ ქრისტიანული რელიგია, ერისათვის სულიერ მსხნელად მოვლენილი და მიღებული, ეროვნულ ცნობიერებას ავითარებს და აღორძინებს, მიუხედავად იმისა, რომ მესიანიზმი ეთნოფილეთიზმის გამოხატულებაა.

ნიკოლოზ გულაბერისძის „საკითხავი“ თხრობაა ცხოველი სვეტის შესახებ, ხოლო საგალობლები მისი ქებაა, შესხმაა. ქართველთათვის (არა მხოლოდ მათთვის) ცხოველი სვეტია მიჩნეული ყოველი სიკეთის სიმბოლოდ და საწყისად. ცეცხლის ან ნათლის სვეტი ღმერთის სიმბოლოა, ხოლო ღვთისმშობლისაგან შობილი განკაცებული ძე ღვთისა მიუძღვის კაცობრიობას ღვთაებრივი ნათლისაკენ, ზეცისაკენ. არმაზის კერპთა მსხვრევა, ბომონთა დამხობა ქართველთა სულიერი აღდგომის დასაწყისი იყო, რაც ნიკოლოზ გულაბერისძემ სახისმეტყველებითად გარდათქმული მიაწოდა მსმენელსა თუ მკითხველს: „*ეპა საღმრთოა შეკვალუბა ესე, საყდარი არმაზის წილ და მიპრონი ნაგებთა წილ, ხოლო ბომონთა წილ სუეტი წმიდაა ცხოველი მოგუანჩუა ძემან ღმრთისამან*“ (გულაბერისძე, 2007: 75). ცხოველი სვეტი „წარმოუცენებს“ ქართველ ერს მირონს, სულიერ ნათელს აზიარებს, ნაცვლად „ძველი და მამული სჯულისა“, ქართველ ერს იმედად მოველინა მაცხოვრის კვართი, მის ადგილზე ამოსული ნაძვი ღიბანისა, გარდასახული სვეტად ცხოველად და მისი მოკვეთის შემდეგ იქ აღმართული წმინდა საყდარი.

ლიტერატურა:

1. წმ. ანდრია კრიტელი, დიდი კანონი, ნეკრესის ეპარქიის გამოცემა, 2002
2. გრიგოლაშვილი, 2005 – ლ. გრიგოლაშვილი, დავით აღმაშენებლის „გალობანი სინანულისანი“, თბ., 2005.
3. გულაბერისძე, 2007 – ნიკოლოზ გულაბერისძე, თბზულებანი, გამოსაცემად მოამზადა, გამოცემა ლევო, ლექსიკონი და საძიებლები დაურთო ნესტან სულაგამ, თბ., 2007.
4. წმ. იოანე ოქროპირი, 1993 – წმ. იოანე ოქროპირი, განმარტება იოანეს სახარებისა, II, თბ., 1993.
5. კეკელიძე 1957 – კ. კეკელიძე, ეტიოლოგიური ძეგლი ქართული ლიტერატურის ისტორიიდან, IV, თბ., 1957.
6. კუჭუხიძე, 1998 – გ. კუჭუხიძე, უფლის კვართის სიმბოლიკოსათვის, ჟ. ცისკარი, 1998, №3.
7. სირაძე, 1992 – რ. სირაძე, ქრისტიანული კულტურა და ქართული მწერლობა, I, თბ., 1992.
8. სირაძე, 2000 – ქრისტიანული კულტურის საფუძვლები, თბ., 2000.
9. ლიხაჩოვი, 1987 – Лихачев Д.С. Заметки о русском. // Лихачев Д.С. Избранные работы в трех томах. Т. 2. Л., 1987.
10. ლოსცი, 1980 – Ф. Лосев, История античной эстетики, поздний эллинизм, М., 1980.
11. მეტაფრასული, 1986 – ძველი მეტაფრასული კრებულები, ტექსტი გამოსაცემად მოამზადა ნარგიზა გოგუაძემ, თბ., 1986.
12. მოდებაძე, 2007 – И. Модebaдзе, Символизм образов природных стихий в кавказской лирике русских романтиков. Доклад на I симпозиуме . Тб., 2007.
13. ფლორენსკი, 1990 – П. Флоренский, Столп и утверждение истины, I, М., 1990.
14. სულაგა, 2003 – ნ. სულაგა, XII-XIII საუკუნეების ქართული ჰიმნოგრაფია, თბ., 2003.
15. ძეგლები, 1967 – ძველი ქართული აგიორგაფიული ლიტერატურის ძეგლები, II, გამოსაცემად მოამზადეს ილ. აბულაძემ, ნ. ათანულისძემ, ნ. გოგუაძემ, მ. დოლაჭიძემ, ც. ქურციკიძემ, ც. ჭანკეზა და ც. ჯღამაიამ, ილია აბულაძის ხელმძღვანელობითა და რედაქციით, თბ., 1967.
16. წერეთელი, 2005 – ლ. წერეთელი, „ძველი დღეთა“ (მამა-ძეობა) დავით აღმაშენებლის ცხოვრებასა და „დავითიანში“, კრებ.: დავით გურამიშვილი – 300, ლიტერატურის ინსტიტუტის გამოცემა, 2005.
17. ჭელიძე, 1997 – ე. ჭელიძე, საქართველოს მართლმადიდებლური ეკლესიის ისტორიიდან, საქართველოს საბატრიარქო, 1997, №1
18. ჯაფარიძე, 1998 – მთავარეპისკოპოსი ანანია ჯაფარიძე, საქართველოს სამოციქულო ეკლესიის ისტორია, II, თბ., 1998.